

四庫全書

史部

欽定四庫全書

赤城志卷二十七

宋 陳耆卿 撰

寺觀門一

自佛老氏出摩盪掀舞環一世而趨之斯道殆薄蝕矣
粗之為禍福使愚者懼精之為清淨寂滅使智者惑蓋
其竊吾說之似以為彼術之真如据影搏物而熟眎之
則非也以故台之為州廣不五百里而為僧廬道宇者
四百有奇吁盛哉今吾孔子孟子之像設不增或屋仆

漫不治而穹堂偉殿獨於彼甘心焉豈其無禍福以懼人而無思無為之旨反出清淨寂滅之下邪今備錄之非以滋惑亦使觀者知彼之盛而防吾之衰庶少輔世教云爾

寺院

州

禪院五

報恩光孝寺在州東南一里一百步巾子山下唐開元

中建舊傳有小刹七曰楞嚴水陸證道積善天光
景德藏院至是合為一賜額開元國朝景德中更
名景德崇寧二年因臣寮奏詔天下建崇寧寺州
以此寺應詔加萬壽二字遇天寧節度僧一人殿
後有戒壇元祐五年僧元照建也
楊傑為政和元
年改崇寧為天寧紹興七年改天寧為廣孝十五
年以追崇徽宗改今額乾道九年火僧德光有權
踵新之淳熙三年錢參政端禮建僧堂十年其孫

丞相象祖建佛殿寺始復舊觀惟羅漢閣無重砌者寺東有古塔一或傳梁岳陽王得釋迦舍利建塔七今所存止此又傳有齊眉大師趺化如生塔于寺之東隅今貢院後有小浮圖在焉銅鐘一蓋唐乾元癸亥所鑄又有佛牙二株沈香觀音像及

累朝所賜宸翰甚衆

尤守表僧堂記云淳熙三年秋七月故參政觀文錢公施

其私財於台州報恩光孝禪寺復建僧堂明年九月十二日經始後十五日而公薨又明年六月二日堂成中為大屋七間高七尋其廣四十有二尺其深十尋前列修廊後布廣廡其楹高與廣皆如

其堂之數而崇深殺之貫三夾廊為二井區凡為屋之楹大小二十有四規模雄壯悉倍於舊公之孫承議郎前知處州軍州事象祖題其榜曰選佛合道俗以落之又明年長老惟裡命其徒了性持書求文於錫山尤袤而記之曰天台為邦仙聖所遊佛法之盛冠于東州有大叢林舊名景德衆妙莊嚴近在城域政和之初賜額天寧紹興之間始易今名是為祐陵追福之地列屋千楹有衆萬指乾道癸巳鬱攸扇災紺壁穹堂化為飛灰時大比丘德光長老立志堅忍誓必再造乃泛扁舟浮海而南持鉢于泉半歲乃還憔悴辛勤寸絮銖積乃建衆寮乃營丈室規創後壁架虛鑿空高工度材施者恐後惟光之名進于帝聽有詔自天命主靈隱衰時假守睹是勝因求繼光後實難其人萬口一詞曰有權可乃屈致之權不拒我於煨燼中啟大法筵遠近歸依輻輳駢闐寶殿迄成於從空墮

權未嘗為不起于坐有大檀施觀文公錢與是比丘有大因緣私自念言安聚衲子以有加蓋為一大事導師所在龍象駸奔四方學徒其來如雲而此僧堂獨不建立起寺之廢莫此為急我當布施為衆萬先捐三百萬於指顧間公之視財如視土壤我無所施隨取而予權之受施如谷受風我無所受有求則容權謂其徒監寺了性汝敏而勤命總其政性亦受令奔走後先陶瓦成山伐木蔽川權來權藏四衆嗟惜予選惟禪嗣其法席裡之始來衆曰難哉裡來一年衆志允諧巧者獻伎壯者出力涓日庀徒並舉百役乃立斯堂其大七楹高廣深邃寒溫暑清前榮後廡兩倍其數寢食有位宴息有所偉哉斯堂肇自錢公不逮其成而公已終惟公有孫銜訓嗣事爰飾几榻至於塗墍齋鼓粥魚隱隱隆隆攝齊升堂肅肅雍雍舊觀復還百廢具舉如蹟得聽若瞽而睹數有成壞時有廢興

法力願力為無不成惟三比丘與二居士往昔靈山並受佛記作此勝事剎那頃中化瓦礫場為梵帝宮咨汝大眾享此安逸云何修行報此恩德當念作者法力宏深勇猛精進無起退心當念施者願力堅重彼來處無妄受用惟上祖師穴處巖居今汝不然夏屋渠渠惟上祖師行乞取足今汝不然飽飯果腹廣席連床窓戶明虛心境洞然萬法一如卧具巾篔隨用無乏困歇饑餐莫非妙法汝若一念證常寂光華嚴境界即是此堂汝若不斷五欲三毒當知此堂即是地獄中山崇崇與堂無窮我為斯文相其鼓鐘

兜率寺在州東南二里周廣順三年吳越王建舊有勝光和尚居之名勝光安國國朝大中祥符元年改今

額上有觀音殿即舊景德寺水月像也

翟參政汝文謫居時

形之夢欲改塑凡三四弗類工泣禱是夜夢白衣高髻如生塑而成趙守企詩云一到巾山眼界寬招提直在翠微間黃鸝過處金穿柳白鶯飛時雪點山魚艇兩三隨月上海帆八九趁潮還歸時聽得梅花角落日西城未掩關

嘉祐院在州北一里舊名淨名庵後改今額僧長吉嘗

遊京師得宋叅政庠以下一百四十五人所書般

若經建臺以實之復自刺血書維摩經附焉

宋諫議庠

記云建塔廟散香華奉經典攝受妄迷而為功德有為者為之雖然佛滅度三千年世與法交相喪

濁劫下根誅為愚冥非廣示像法無以震動而傾
駭之使趨善良神道化時巨得而已沙門長吉當
茲世為功德者也初師以釋子之秀乘上都會譯
場高選義學僧敷演祖教名在籍右始與龍象為
徒而覺華餘輝注射物境頗作歌詩雜擬輒自冀
其宗由是益為人聞俄詔賜紫方袍號梵才大師
勝流欽風多所延供久之厭著謝去復山林之遊
歲在降婁始還台州守悅其風虛淨名庵以舍
之惟師行嚴而身修寓曠而氣安能示方便悅可
大衆居三年道益光明台人異焉捐金抵壁踵往
瞻事四方來者與麻革俱乃闢精廬而肆之刊林
衡鏤巖椒棘如而堂媚如而庭者且數百筵朝薰
夜被供擬尤具九年復作一成臺置大般若經六
百篇及刻千劫佛像彼彼貨與力不募自至弗可背
紀師復砭膚取血書維摩經質神為要又欲推慧
命而廣之乃謀於公卿大人於是龍圖閣直學士

南陽葉君倡始籲謀分繕寶與凡臺閣方面知名士數十族叢喜迭捨參訖屬庸閱三年臺成納經奉像度而安之黑白相趨距躍圍繞以為去聖滋遠有能駕其說植德於人令夫威神巍巍現前知親炙面命不在是經乎因是經讀誦悟入括五蘊泯空色攬萬異為真其為福又可勝量耶僕頃與師游樂其誓願之就且枉錫顧我丐辭以永傳因宣是義而倡之曰臺屹而崇摧我慢而恭兮經華而精竦我怠而誠兮像嚴而顯被吾魔而善兮報我四恩常不減而存兮師聞之謂余言為信若其營綜之烈投施之衆日月之謹大槩具之矣夫筆不可文言不能宣者僕與師均寄一歎而已宋祁詩云故人詩未報恨恨復經年夢去長江路心知寶所天身依巖桂老詩與暮雲傳無柰纓綉累猶蒙方外緣又詩云名高身愈隱孤錫倚巖扃園布黃金地臺藏白馬經捲雲吞暝燭潤月瀉

虛瓶坐想谿橋路莓苔又幾青周延雋詩云幽
致極東南青陰潤客衫林深纔辨徑雲滿欲藏巖
琴想山猿伴花憎谷鳥銜孤標如可挹墜葉悵開
絨錢惟演詩云漢苑辭千柰仙丘訪五芝汲餅
春溜滿卷衲曉雲滋望剎青龍起觀濤白馬馳紅
樓曾應制佳句詠朝綺蔣堂詩云老被詩名繫
此身思山深去避人羣寶臺千尺隔江見清磬一
聲歸路聞巖上開扉燈照月庵前掃地雪和雲終
焉此是清涼處淨
住無慚相國文

普寧院在州東北二里舊名上方資國建隆中錢忠懿
王建大中祥符元年改今額

崇法院在州東二里舊名紫凝周顯德元年建國朝天

禧元年改今額今廢

教院五

寧國院在州東二里舊名六通晉天福二年建國朝大

中祥符中改今額有銅鐘一梁乾化中所鑄

延壽院在州東一里三百步皇祐五年重建或云即古

倉基大中祥符元年賜額舊有凌雲軒後廢

開禧中雨

後壁壞有
黑米之異

普濟院在州東北一里三百步舊在州東一里名普賢

今狀元
塘是也

大中祥符元年建治平三年改今額崇寧

元年以其址卑濕徙今地

順感院在州東二百步舊名報國晉天福二年郡人凌

延熙捨宅建國朝大中祥符元年改今額舊有觀

閣今廢

趙守企題云一上危梯一解顏重崗複嶺
四周環山川盡出登臨外天地都歸俯仰

間飛鳥直隨雙目斷遊雲長與片心閒
文書了却無餘事日午須來日落還

福安院在州東一里二百步舊名興福保安治平三年

改今額今廢惟殿堂兩廡僅存

詳見貢院門

律院一

崇壽院在州東北二里舊名彌陀建隆元年錢忠懿王

建大中祥符元年賜今額淳熙三年其孫參政端

禮重新之

錢自為記

嘉定十六年齊守碩請以禪為律

甲乙院十

永慶院在州北一里即古郡治舊名白雲延壽庵太平

興國二年錢守昱建咸平二年賜今額寺後有泉

庵以其旁泓水故名

唐守仲友題云萬斛出時非擇地一泓澄處本無心

西有翠屏亭一覽亭今皆廢

丁注題一覽亭詩云插迴飛簷聳凌虛壘

砌危四天欄下揖萬象掌中窺目力不到處雲容無盡時塵塵皆勝事凭檻幾人知張景修題云

衙城直上有煙巒亭在重崖絕壁間幾箇白頭忘歲月一生青眼看江山秋風落木樓臺出暮雨籠

沙鷗鷺閑珍重京西繡

衣使作書題榜許追攀

明慶塔院在州巾子山上舊名淨光塔院乾德五年錢

守昱建大中祥符四年賜今額

按僧子文結界院記有芟洗蘿蒿披

伐榛荆鱗布層基翼建寶塔森沈月殿蕭洒星廊之語其詳及題詠附見巾子山

寶城院在州東一里舊名護國唐光啟三年僧道元建

國朝大中祥符元年改今額

章郵公得象為之記

舊有清熙

堂

陳右司瓘為作夏講疏按瓘政和六年以詆誣羈管居此時蔡氏黨方盛每密諷守石城脅而

殺之呵守嚴甚又嘗召至庭怖以後命瓘竟不屈嘗為寺作修造等疏見集中

惠日院在州東一里舊名羅漢晉天福五年建國朝大

中祥符三年改今額有大塔幢鐫唐大中十一年

妙勝院在州西一百步一名石佛舊傳闢基時得石佛

三軀塑之殿故名按題梁紹興十五年重建鍾乃

顯德二年錢王女所鑄

小兜率院在州東一里天聖七年建

祚聖院在州東北一里一百三十步白雲山下舊名白雲按傳燈錄唐欣禪師嘗受業焉沈佺期餞台州刺史序云懷白雲之蘭若蓋指此也國朝乾興元年重建大中祥符元年改今額今廢

資聖院在州東南二里建隆四年建有定光巖昔有僧於此誦法華經俄而光現故以為名治平二年賜今額今廢

福聖院在州北一里大觀三年重建今廢舊有松軒趙守

企題北山松軒詩云萬木有榮謝此松無盛衰夢

關秋韻起碁罷午陰移般匠顧不顧秦君知未知

亭亭高節在看取雪霜時 張景修題云雪天蒼

翠暑天風珍重僧軒十八公不是詩人少吟詠世

間花草

易為工

勝因院在州東二里治平二年建今廢

尼院二

淨慧寺在州南三百步唐武德元年建乃妙善公主道

場二年賜額國朝淳熙二年重建

演教院在州東三百五十步淨慧子院唐武德元年建
二年賜額

臨海

禪院二十有六

惠因寺在縣東南一百二十九里舊名禪房宋元嘉四
年僧應俊建國朝大中祥符元年賜名惠因熙寧
中僧了塵重新之紹興三十二年錢太師忱家乞
為香燈院加崇親其後孫丞相象祖還諸朝復今

額

報恩行慶院在縣東四十五里舊名興福俗又名龍華

晉天福六年建國朝紹興六年范丞相宗尹家乞

為香燈院遂改今額

初范公遊此愛其幽勝題詩有茲遊恐不再聊寄小詩中

之句人謂非佳識
月餘堯竟葬其中

隆恩院在縣東南一百二十五里舊名明恩大中祥符

九年縣人周園捨基建先是唐武德初有翁募禪

師卓庵於此治平三年改今額乾道元年稍徙高

奩一新之

褒忠顯績院在縣西三十里舊名景福唐武德二年建
應順元年改慈聖國朝紹興九年呂丞相頤浩家
乞為香燈院遂改今額

保福院在縣南一十五里周廣順四年建晉開運四年
賜額

青蓮院在縣西北二十里舊名興善大中祥符元年改
今額紹興十年重建

具足院在縣東北二十五里舊名百文晉天福六年建
國朝治平三年改今額

慶恩院在縣東南二十五里舊名報恩石晉會同元年
建國朝乾德三年改今額

昌國院在縣南二十五里舊名佛窟周廣順二年建國
朝大中祥符元年改今額

法海院在縣南二十五里太平興國七年建治平三年
賜額

惠明院在縣西北三十里舊名重元建隆四年建祥符
七年改今額

顯恩褒親院在縣西四十里舊名顯名淳熙三年曹開
府勛家乞為香燈院遂改今額

普安院在縣西四十五里舊名安像寶藏巖蕭梁時建
國朝治平三年賜今額

淨安院在縣西五十五里舊名資壽庵咸平元年賜今
額淳熙十四年僧了恭重建

張郎中布
為之記

寺後有大

雷峰面直常風山

惠峰院在縣西北五十五里舊名福田唐咸通十三年

建國朝大中祥符元年改今額

延恩院在縣東南七十九里舊名湧泉晉太康中建蓋

因任旭女弟卓庵誦蓮經俄有泉自地湧出生

白蓮華故名其後僧懷玉居焉唐咸通中改今額

法安院在縣東九十里舊名廣濟保安吳越寶正五年

建國朝治平三年改今額

廣福院在縣東九十里舊名資瑞唐元和六年僧重濟
建國朝隆興元年改今額

真如院在縣東一百五里舊名回向唐武德二年建國
朝大中祥符元年改今額

金仙院在縣東南一百一十九里舊名雉溪慶厯元年
建治平三年改今額

常樂院在縣東南一百二十四里舊名崇福嘉祐元年
建治平三年改今額

崇梵院在縣東南一百二十五里太平興國二年建初
僧智顛於寺南北建放生池且造阿育王塔號普
光塔院治平三年賜今額

法興院在縣東南一百三十里治平元年建建炎四年
賜額

鴻祐院在縣東一百六十里舊名資福晉天福八年建
國朝治平三年改今額

安聖院在縣東一百七十里舊名新安晉天福四年建

國朝治平三年改今額

威神院在縣西北五里舊名天王院乾德四年建大中

祥符二年改今額

教院三十有一

能仁寺在縣東北四十五里舊名承天元符二年建有

九祖閣羅漢堂政和七年改今額嘉定十四年御

書寺扁及藏額八字今剏閣奉焉側有普同塔蓋

紹興中僧法照掩遺骸處

石公孺為之記姚舜諧題云面勢崔嵬插斗牛

東分一掖鎮丹丘玉堯金相祖師會寶帙琅函海
藏流蒼檜茂林嘗蔭映白蓮香社共熏修紅塵斷
處人難到俗駕經年始此遊承天
白蓮舊同一院故有共熏修之句

白蓮寺在縣東北四十五里舊名白蓮庵慶曆五年僧

本如建魏國大長公主請令額舊有十六觀堂嘉

定十年御書扁題四字以賜乃改院為寺按智顛

教起天台佛隴而白蓮能仁宗而闡之號東掖兩

山云章守得象題云聞說新庵號白蓮五峯環繞

布金田虎溪社共何人繼佛隴燈從幾代傳

嵐色排空長似畫松枝偃蓋不知年勞生已作歸
休計願解塵纓結淨緣石象之題云結社當年

號白蓮師心應欲繼前賢有時
中夜初回定清磬一聲秋月圓

大中祥符寺在縣東南一百一十九里舊名靈穆晉永

康中土人陳坦捨基建國朝大中祥符元年改今

額建炎四年巡幸有御座尚存

父老云往歲懺院
摧剝盜竊三銅象

越海而去踰百日有僧遇之閩江迎像而還朝發
暮至今在東掖能仁寺又有一浮圖內多古軌題
曰上元丁卯靈穆寺塔記按唐有
兩上元年號皆非丁卯殊不可曉

保寧廣福寺在縣西北六十里舊名永明五代時僧德

韶建國朝天禧元年改保寧廣福開禧元年謝丞

相深甫家乞為香燈院遂改今額

雲巖寺在縣東北四十五里舊名松山梁天監二年建
國朝大中祥符元年改今額

保壽院在縣東南七里舊名普明乾德二年建祥符中
改今額東有塔乃僧德韶建俗名白塔有三目觀
音三目者舊傳天聖初有一木汧潮而至洎于院
山浮圖之下時見異光僧惟諒遂以為像奉安日
剝然有聲視其目裂為三矣自是禱者益衆生之

日尤盛

普濟院在縣東七里蔡嶺舊名廣濟在西南一里俗號

東茶院治平初改今額熙寧中徙今地時有僧法

腴庵於西山持呪水湧以療疾立愈側有井井上

有亭

羅提刑適為之記

舊有秀野亭地多梅花

元守絳題云亭占青

山口郊原四望平遙林連崦黑白水隔田明翠麥波濤動飛泉劔珮輕長年便野趣擬欲解塵纓

善濟院在縣東南一百二十里金鰲山本祥符塔院建

炎四年巡幸賜今額洎金三十兩度僧三人有御

座尚存西有如畫軒下瞰長江前挹海門諸峯

寺壁

舊有詩云牡蠣灘頭一艇橫夕陽多處待潮生與君不負登臨約同向金鰲背上行巡幸時見詩嘉歎訪其人已逝後人題詠甚衆惟一絕云黃帽當年轉舳舻東浮鯨海入三吳中興事業風波惡好作君王座右圖人多稱之潘朝英題如畫軒云春潮暮落海門山百艇齊飛牡蠣灘分得魚鰕歸野市滿江鷗鷺夕陽閒又倦客登臨力已疲高僧故索小牕詩江山最好君知否春去秋來烟雨時又有人題休說三江與五湖平生心眼此中舒人人摠道渾如畫祇恐丹青畫不如

淨信院在縣東七里舊名資國唐光啟二年建國朝治

平三年改今額

香積院在縣西北一十五里大中祥符中賜額元祐中僧良弼重建

淨慧院在縣東南一十九里宣和中燬于寇紹興二年重建

寶嚴院在縣南二十九里舊名香積唐會昌中廢乾寧元年重建改名香嚴國朝治平三年改今額

靈鷲院在縣南二十里舊名瑞峯治平三年改今額俗稱小靈鷲

小能仁院在院東二十五里大中祥符三年建康定元
年賜名承天大觀中改今額

真如院在縣東北二十五里舊名石門梁天監三年建
晉天福八年改今額

無量院在縣東南三十里景德中僧鑒融建大中祥符
元年賜額

廣化院在縣東南三十五里舊名善化治平三年改今
額

大安院在縣西北四十里舊名普安唐大厯元年建乾
寧三年改今額

延福院在縣東四十五里五代時建舊傳一巖甚美常
現祥光故名應瑞峯且有堂曰瑞光國朝大中祥
符元年賜今額

淨戒院在縣西四十五里舊名資聖庵周顯德中建國
朝治平三年賜今額

正真院在縣東四十五里舊名靈龜庵大中祥符九年

建熙寧六年賜今額

妙緣院在縣東南四十七里舊名資福唐會昌五年建

國朝治平三年改今額

慈相院在縣東南四十九里舊名慈聖乾德四年重建

治平三年改今額

上妙院在縣東南六十里舊名護安梁乾化二年建國

朝治平三年改今額

福海院在縣東南六十九里舊名資福治平三年改今

額

薦福院在縣東南八十九里舊名寶際唐興元元年建

國朝大中祥符三年改今額

妙智院在縣東九十里舊名觀音建隆四年建治平三

年改今額

寶惠院在縣東一百三十里舊名水陸太平興國六年

建大中祥符中改今額

安住院在縣東一百七十里晉天福八年建國朝治平

三年賜額

吉祥院在縣西北六十里

廣福院在縣東二十五里舊名保福唐天成三年建國

朝熙寧三年改壽聖紹興三十二年改今額今廢

律院三

顯孝南山寺在縣西五里日山舊名永明嘉祐八年建

嘉定三年錢丞相象祖家奏以教為律遂改今額

錢守暄遊日山詩云清晨渡水陟秋山日上高原
葉葉丹已傍松筠尋磴道更瞻堂殿倚層巒梁間

雲氣蒸衣潤窻外嵐光照席寒顧我塵勞差少暇暫驅
熊軾一盤桓 葛守闕題云六時香火集宗雷日上雲
收紫翠開應笑守麾公暇少三年官滿一曾來鐘
周守延雋題云津頭催渡隔城陰祇苑深幽結客
尋綠稻一川春後滿白雲千嶂晚來深疎鐘流響
猶含谷餘燼清芬尚襲襟多愧空疎無夢筆敢期
雜擬惠休吟 孔文仲題云尋盡城中山又訪江
外寺蘭舟涉澄漪隼旌入疎翠樓臺初日升巖谷
宿雲墜飛泉百禽鳴怪石萬虬躡絕菴皆步登佳
木留客醉洞天生畫寒桃源發春意煙霞暫深濶
宇宙忽殊異海國遇昇平鈴齋無俗事穎川擅才
敏康樂足情意只恐新詩多鑄鏡費年祀 趙守
企題云背日西來眼界明隔溪遙見楚王城旌旗
來道蔽山影笳鼓入林聞谷聲青鳥向人疑有意
白雲迎客不無情夕陽臨水共歸去明日紛紛塵
事生 郭三益題云洗光朝日上旋旋瑞色分臨

此地先門迥帆收江市密山深龍卧海潭圓靜然
栢子聽幽偈閒立苔痕問小禪莫訝潮平歸渡晚
斯遊有意

己三年

妙果院在縣西北三十里唐乾寧五年建舊傳羅漢嘗
應跡焉故號羅漢院開平三年賜名敬修治平三
年改今額嘉定十六年齊守碩請以教為律

甲乙院五十有五

延慶院在縣西八里舊名龍山梁天監初建唐會昌中
廢開平中改龍潭院錢忠懿王改戲龍國朝大中

祥符中改今額

夏英公竦記云臨海濟靈江而西越萬步至括蒼山與真隱山並間

有垂流千仞漱石成淵蛟龍宅之而雲雨攸生歲有驕陽亢極並禱羣望寂寥無證則邦之守臣帥寮屬而縈之薦牲沈玉以請常有雲油然發乎湫中暝山暨川雷震風動不崇朝而雨足予佐郡再祀而兩往既享既禱絕澗而反至于山麓坦然右平顧之則有浮屠氏之宮在焉道出于側因憇其所視其榜曰延慶院問其僧曰全議考其興替索其傳記則梁天監初始建為龍山寺至唐會昌五年而廢未期復興開平中刺史駱延訓親篆榜而改之為龍潭院唐祚不永錢氏據有湘水忠懿王椒始領此郡復新其額為戲龍院皆以邇龍淵而得名也國家受命旁宣教象我崇文廣武儀天尊道寶應章感聖明仁孝皇帝告成功之歲有詔賜今額焉問其傳授則遠者不能詳矣詰其近則乾

化中有僧常一始旁鑿靈阜全葺棟宇次傳慶仁道進雲泰雲興令逢至于全議凡七世矣其殿宇廊廡多全議糾檀施所就也觀其巖岬齟齬溪流湧滴古木怪石偃蹇盤踞雲物萬狀融冶凝結疎篁茂草槎櫂蔓衍高下嚮背宛為靈區嘉遯之室不築講學之館未締竺乾氏方牆華屋即而有之於戲盛哉麗哉既盛且麗控引勝絕四方之中豈獨於此予關掌郡事政不專出無明誠以感造化無至仁以召和氣雨不時至下民其憂故再走靈湫得請於廟懇于是舍須雨而旋噫豈人至靈而弗神於龍彼裸壇於齋者獨何人哉豈修己行義之有所未至乎當以日繼月而成吾志屬寺僧全議固請作記因并書而授之俾勒于石使後之識者覩斯文知不徒然而作也章守得象題云碧澗連龍穴層巒倚括蒼無時似風雨繞院盡松篁路僻人難到僧閒日自長勝遊應不負三度屆雲

房黃軫題云寶刹標奇處煙蘿響亂流地靈僧
得住山好客多遊燈影連金像鐘聲散石樓風雷
等閒作咫尺是龍湫黃知良題云松竹冷高陰
蕭森露竇林門依青嶂靜僧隱白雲深淒切泉噴
玉莊嚴地布金龍湫
申致禱朝夕冀為霖

法安院在縣東北五里晉天福元年僧雲暉建俗號仙

宮一徑陰蕭爽游者愛焉寺外有二古經幢國朝

大中祥符元年賜今額舊有梅園

曾守宏父簡洪景伯探梅詩有

云近城殊未發君與探山宮又云得得山宮千樹
白與君騎馬入青苔洪亦有簡曾詩云天知風
月主人賢况是江梅望著鞭已報兵厨招客醉故
教晴日作春妍一年行樂能多少十騎聯飛相後

先好向山宮記名字他時嘉話踵斜川今梅不復
存改為漏澤園矣章守得象詩云路入青青數
里松上方樓閣一重重千尋練掛雙流瀑六曲屏
開四面峯幽鷺猶翹藏翠竹啼猿相對答疎鐘留
連不忍催歸騎回首斜陽煙霧濃

壽安院在縣西北一十三里碧潭山上本僧良弼碧泉

菴元祐三年改菴為院仍賜今額

陸守長倩詩云
松蓋松幢引步

高躋攀終日自忘勞寒泉澄澈新鎔鏡華棟崢嶸
下冠龍軒到嫩嵐濃欲滴菴依疊障勢偏豪雙旌
暮迫城闌去止
觀還應羨毳袍

淨明院在縣東南五十里舊名彌陀庵僧懷玉誦佛之

地國朝治平三年賜今額陳侍郎公輔嘗憇此閱藏經且為詩云三載工

夫一藏經非禪非道亦非僧但憑方寸行諸善也是如來最上乘

無礙院在縣東南一百三十四里舊闕

法

師建隋改攝靜舊傳僧灌頂嘗闕

海寇

擁兵以入見持幟戟者甚盛身皆闕

而竄遂

又名山兵國朝治平三年改今額院有千佛像舊傳章客舟艤

江浙挽之不可遇一僧云必吾挽乃可因畧以指撮取舟遂行繼共載至回浦僧忽墮水須臾浮出

一石乃此像也

惠濟院在縣東二里舊名惠通唐乾寧二年守沈仁綰
捨基建俗傳仁綰發地得觀音像遂以為寺又名
上觀音國朝天聖二年改今額

開福院在縣東南五里舊號資糧建隆四年建成平二
年賜今額舊有白蓮堂寺旁地號鷺鷥林

陳白詩
云鷺行

飛起綠楊岸漁笛吹殘明月灘一
片畫圖收不盡何人終日倚欄干

靈鷲院在縣東四十五里舊名隱然唐光化二年守駱
延壽建後改隱龍後又改隱跡國朝治平三年改

今額中有古塔僧智顛所創

永福院在縣西北二里舊名無垢浴院乾德五年建後

改廣福治平三年改今額

梵巖院在縣西北

闕

治平三年建後改今

額

慶修院在縣南六里舊名下觀音治平三年改今額今

佛殿僅存

資聖院在縣西七里舊名興國周顯德三年建國朝大

中祥符元年改今額

淨巖院在縣西七里舊名延壽王院治平三年改今額
真空院在縣西南九里舊名仁皇般若一名疊石慶厯

中建

李熙輔題云括蒼山上雲山好雲亦好可憐山下僧看雲不知老

延福院在縣西南七里舊名重元建隆四年建大中祥
符元年改今額

顯教報慈院在縣西北一十二里舊名報國唐時建國
朝治平三年改覺仁慶元四年謝丞相深甫家乞

為香燈院遂改今額

何觀文澹為之記

淨樂院在縣東一十五里舊名奧真晉開運三年李敬

之捨宅建國朝治平三年改今額

瑞相院在縣西南一十四里舊名松巖慶歷中改今額

多福院在縣西北一十五里舊名集福俗號西茶

闕

武德元年建國朝治平三年改今額

正道院在縣西南二十九里宣和中燬于寇紹興二年

重建

萬安院在縣東一十九里舊名安福梁太清元年建國朝大中祥符三年改今額

楞伽院在縣東南二十里唐乾符元年僧道悅建先是悅卓菴有兩瑞竹生其前賜名乾符菩提國朝景

德四年改今額

院有楊
傑施文

延豐院在縣東南二十二里舊名朝遷唐光啟三年僧師俸建國朝大中祥符中改今額

定光院在縣南二十三里舊名勝光塔院又名香巖晉

會同元年建國朝治平三年改今額

禪宗院在縣東北二十里梁天監二年建國朝大中祥符元年賜額

崇福院在縣東二十五里舊名菩提乃古侃村道場唐咸通七年建乾祐二年改寶慶國朝大中祥符元年改今額

廣修院在縣南二十五里唐光啟四年建景福二年闕
巖國朝大中祥符元年改今額

慧門院在縣西北二十五里舊名靈龜五代時建國朝
治平三年改今額

慈雲院在縣東北二十五里舊名興壽周顯德三年建
國朝淳化中改名雲溪治平三年改今額

淨土院在縣西三十二里舊名丹山五代時建國朝治
平三年改今額

法輪院在縣東三十五里西溪舊在院左半里梁大同
中建國朝崇寧五年改今額宣和四年徙今地

普明院在縣西北四十里舊名護明晉開運二年建國
朝治平三年改今額

安福院在縣西北四十五里舊名雲水菴建隆中建治
平三年賜今額

法慧院在縣東南五十里舊名靈峯大中祥符七年建
後改今額

定明院在縣東五十里周顯德三年建國朝治平三年
賜額

治平院在縣西五十里舊名招賢梁普通元年建國朝
治平三年改今額

安禪院在縣西五十五里舊名禪師菴周廣順中建國
朝治平三年賜今額

澄靈院在縣東南六十里舊名甘泉唐開運中建國朝
大中祥符元年改今額

大仁院在縣東南六十九里舊名安仁唐景福二年建
國朝至道元年改今額

惠安院在縣東南一百里舊名普安唐咸通中建國朝
大中祥符二年改今額

淨覺院在縣東南一百九里舊名永寧大中祥符二年
建後有山九盤松蔽其上號九盤松治平三年改
今額

多福院在縣東北一百八里唐長興四年僧德韶建國
朝宣和中燬于寇乾道二年重建

清修院在縣東南一百一十五里舊名塔菴寶元元年

建治平三年賜今額

崇相院在縣東南一百二十里舊名育王塔院吳越時

僧師拱建國朝治平三年賜今額

精進院在縣東一百二十里舊名保安梁貞明五年建

國朝治平三年改今額

法雲院在縣東一百三十里舊名仙巖晉開運四年建

國朝大中祥符元年改今額

智顯院在縣西北六十五里

無垢院在縣東一十二里舊名鷲峯大中祥符元年建

後改今額今廢

張景修題云禪房閉深花錫杖生古蘚秋山翡翠寒春水玻璃軟無

嫌墻太低但恐路不遠何人坐長松令我思韋僊

石公弼題云沿磴穿嵐造竹扉一軒幽敞坐忘

機池鏡瓊骨容清泚凭檻時看翡翠飛又云淨界

曾無一點塵風疎松竹響天真從來此意少人會

只道林間無至人

興教院在縣南五里舊名遇明興國治平三年改今額

今廢

清心院在縣西南四十里舊名法華懺院治平三年賜

今額今廢

光相院在縣東南六十里僧光相道場乾德四年建咸平四年賜額今廢

保真院在縣東一百三十里梁乾化中建國朝治平三年賜額今廢

仁濟院在縣南一里小固山上今廢

景德院在縣北三里望海尖山上今廢

福壽院在縣東四十五里今廢

尼院三

妙相院在縣東南一百三十里宣和中尼德基捨菴建

建炎巡幸詢高僧或以住持惠定對遂賜今額

石公

孺為
之記

寶積院在縣東南一百二十里後唐時建國朝建炎四

年賜今額

壽昌院在縣西北五十五里後廢嘉定十五年重建十

六年齊守碩請改為尼

赤城志卷二十七

欽定四庫全書

史部

赤城志卷

二十八至
三十

詳校官監察御史_臣沈孫璉

檢討_臣德生覆勘

總校官檢討_臣何思鈞

校對官中書_臣高中

謄錄監生_臣陳秉寧

欽定四庫全書

赤城志卷二十八

宋陳耆卿撰

寺觀門二

寺院

黃巖

禪院三十有三

慶善寺在縣東南五十步舊名安寧晉永和二年建國朝紹興二十一年改今額有二閣一奉太宗御書

一號金光明又放生池在焉

瑞巖淨土寺在縣西北四十五里唐景福初僧師彥建

或云唐大順二年

或又云文德初建

其山石皆紫色乾寧二年賜名

瑞巖僧懷玉智顛皆嘗棲焉國朝祥符元年改今

額乾道中錢參政端禮家乞為香燈院賜名移忠

昭慶後其孫丞相象祖還諸朝復今額

楊傑詩云岩谷連天

嶺杉松徹象山路從雲外入人自海邊還禪榻紅
塵斷經窓白晝間玉蓮生有處香滿翠微間 孫

大廡詩云流水元依澗孤雲不著山萬綠機慮斷
一點淨明還立雪人何在街花鳥自閒羣昏疑網

破柱論落人間又云白蓮開綠水佛子舊家山淨
境無南北塵心有去還林深天籟遠風定水雲間
何日逢征騎

重來翠巖間

教忠崇報寺在縣西五十里東晉隆安二年建舊傳有
僧誦仁王經而甘露降遂名露山後以寇孫恩屯
兵其處忽有飛石擊之退遂改名靈石有隋智顛

緇經臺唐李義山著書堂又有飛來石或傳自西
北飄墜于此一鐘頗鉅云自海門浮至鑄西度鐘
三字國朝紹興初謝參政克家家乞為香燈院遂

改今額

舊傳昔有異人塑殿中佛像期以十旬啟門僧怪之未及期而啟忽有雙鶴飛出跡

所塑纔二像珠髻熒然故寺舊名耀珠殿前有浮圖二藏舍利及貝葉等書云

鴻福寺在縣西八十里東晉永和中建舊有永和堂相

傳菩提引尊者所基至唐咸通中新之按五代石

刻山有獨峯望之若紫雲覆頂芒朶注射山若浮

動故號浮山後有西僧結廬誦經其動遂止國朝

大中祥符四年賜額

香積寺在縣西南二十里晉元興二年建國朝大中祥

符元年賜額按蘇仲昌殿記即古三童寺也

東禪護國院在縣東南二里唐咸通二年建國朝太平

興國五年重建

瑞相院在縣東南七里方山上唐大中六年建國朝治

平三年賜額有辟支佛牙

正等院在縣南二十里唐乾符五年建治平三年賜額

舊有竹軒

吳亶詩云虛室澄心近竹間雪中無事
共徘徊不須翠栢亭前見自有清風座

上來林小未宜輕瘦節歲寒方可看高材支公適
好誠何在豈謂香嚴擊後雷 黃遠詩云隱隱招

提地幽軒無點埃惟栽紫竹種相伴白雲堆疎影
月移轉清聲風送來居常稀俗客貝葉此勤開
張景修詩云種竹纔添十數竿題詩已僅百餘篇
有時碎影搖金地晝日清風伴玉泉不與愛漁人
把釣肯教騎馬客求鞭平生最喜此君子一洒何
當聽雨眠 左緯詩云山色重重嶺碧蘿更栽脩
竹在山阿老僧不識春
頭面但見塔前新笋多

廣化院在縣南二十五里吳赤烏中建國朝政和中斲
地獲大古鏡背上有靈龜二字賜號曰靈龜治平

三年改今額

善法院在縣南三十里大中祥符元年建仍賜額

證法院在縣西三十里舊在方山東唐大順中守杜雄

徙今地因名資福即僧稠木道場國朝大中祥符

元年改今額

按康定元年長吉懺堂記云堂立西南隅至祥符紀號之初募衆廣之觀

此則徙建歲月當在淳化之後祥符之前未詳孰是

慈德院在縣南五十里舊名善德唐中和二年建國朝

治平三年改今額

善住院在縣西五十五里唐太和七年建國朝大中祥

符元年賜額

崇福院在縣西六十里治平三年建仍賜額

淨應院在縣東南六十里舊名感應晉天福八年建國

朝治平三年改今額

金仙院在縣南六十里舊名仙巖唐天寶元年僧子鴻

建國朝治平三年改今額

演教院在縣西六十里雙魚峯吳赤烏二年建仍賜額

廣孝院在縣西南六十里吳赤烏中建國朝治平三年

賜額

般若院在縣西七十里大中祥符元年建仍賜額

禪定院在縣南七十里舊名神祿禪師塔院晉天福七

年建國朝大中祥符三年賜今額

惠衆院在縣南七十里舊名靈泉開寶元年建治平元

年改今額

祇園院在縣南七十里舊名瑞峯即神祿禪師道場晉

天福中建吳越寶正六年改今額

法會院在縣東南七十五里舊名龍華吳越寶正三年

建國朝治平三年改今額

崇國院在縣南七十里舊名普光晉咸和中建國朝景

德中改今額

西安國院在縣西七十里唐清泰三年建國朝治平三

年賜額

明覺院在縣南八十里舊名應龍唐大中二年建昔僧

智顛嘗飛錫于此所指處泉自石出號智者泉國

朝治平三年改今額

吉祥院在縣東南八十里舊名應祥晉天福八年建國
朝治平三年改今額

覺慈院在縣西南八十里唐大中五年建國朝大中祥
符元年賜額

慶恩院在縣東南一百里舊名修福晉天福三年建國
朝治平三年改今額

大明因院在縣東南一百里泉村舊名修福唐大中二
年建國朝大中祥符元年改今額

治平院在縣南一百二十里治平三年建仍賜額

天真院在縣東南二百里海中乾德四年建仍賜額

悟空院在縣東南三百里海中東鎮山上晉天福六年

建國朝治平三年賜額

舊傳有金鐘一寨官曾而取之登舟人鐘俱溺今水

際時現
金光云

教院二十

興善院在縣東南三里舊名瑞隆感應塔院本僧德韶

建國朝大中祥符元年賜今額俗呼山奧寺宣和

中燬于寇紹興二十八年僧文昇新之其後令孫
挺之以旱禱觀音立應乃審天竺梵相建殿以奉

之

彭殿撰椿年為之記汪內翰藻題云已怯驚潮
渡還憂複嶺登途人多問數投宿只尋僧野飯

農夫怪山行稚子能寇來那得爾諸

將解飛騰時藻聞北兵入四明故云

崇善院在縣東南八十里乾德五年建太平興國七年

賜額興善治平元年改今額並寺有巨麓曰紫高
產異茶佛殿後有泉出巖竇人以煮藥多驗

威神院在縣南四十五里舊名靈湫唐乾寧三年建國

朝治平三年改今額寺後崖壁峭立有瀑布及鄭

公臺

國寧院在縣南二十里唐咸通三年建治平三年賜額

內有元祐間題梁曰金門散吏杜蓋祁公族也

小妙智院在縣西南一里內乾德五年建仍賜額

天長院在縣南四里舊名無量壽塔院大中祥符元年

賜今額

寶相院在縣東七里舊名歸依唐乾符中建國朝治平

三年改今額

常樂院在縣東南二十里唐大中六年建國朝治平三年賜額

報恩院在縣北二十里唐清泰三年建國朝嘉祐六年

賜額

壽安院在縣西南二十五里唐中和二年建國朝景德

中賜額

普信院在縣南三十里治平三年建仍賜額

多福院在縣西三十里舊名興福吳赤烏中建國朝治平三年改今額

安國院在縣東南五十里舊名聖水唐大中間建國朝

大中祥符元年改今額

慈雲院在縣西五十里晉隆安二年建國朝大中祥符

元年賜額

慧力院在縣南四十五里唐咸通三年建國朝治平三

年賜額

流慶院在縣南五十里舊名塔院晉天福三年建國朝
大中祥符元年改今額

澄照院在縣東南七十里舊名龍潭天聖元年建治平
三年賜今額

資聖院在縣南八十里溫嶺舊名報國乾德五年建國
朝治平三年改今額

顯慈院在縣南一百里舊名報國唐太和七年建後改
今額

資聖院在縣東南一百里舊名國興唐元和元年建國
朝大中祥符元年改今額

律院二

普澤院在縣東三里隋開皇中建舊在新安廟南國朝
治平三年賜額乾道九年僧彥琚徙今地

勝果院在縣東南二十五里治平三年建仍賜額前有
小嶼名金屏山

右二院嘉定十六年齊守碩請以禪為律

甲乙院三十有四

妙智院在縣東南三十里舊號靈感觀音建隆元年僧

南慧建初慧自蜀輿觀音像至此少憇且昇行不

動少頃彩雲絢霞環匝紛擁且現其相焉闔境尊

異遂留慧營殿其後如吉繼主之有王羲之墨池

內照庵滌慮軒

陸農師佃記云佛出西方不知幾千萬里其書之契理會道與中國

聖人之言一又其神靈之寓光影著見若今我眉天台感觸之異非獨中州之人聞而趨之雖西域其徒亦累譯而至也與道家之說蓬萊方丈乃在烟海渺茫荒忽不考之外異矣黃巖遠邑也以

鄰天台其俗無貴賤大抵嚮佛雖屠羊履豕牛醫馬走漿奴酒保并避之家亦望佛刹輒式遇其象且拜也以故學佛之徒歸官宇為莊嚴則吝者施財惰者輸力樞者獻塗眇者効隼擊者與之磨砮而土木之功蒼黠楮堊之飾殆無遺巧然其最佳曰妙智寺蓋建隆中僧南慧之所造迨今百年繼者非一而卒成者如吉也余聞之也夫所謂妙智者佛之所知是也疏觀泛救無適而非真可得而不可求可知而不可授雖母欲以與季不能也蓋智難口傳妙須心解如此今以名其寺如吉與其徒託而居之矣當知是也彼世之人舍是弗圖而逐逐於外以事莊嚴則雖締以金銀絡以珠玉譬猶蜃虛成樓半出霄漢其彩五色終非實相如吉善住持置田數百畝延十方衆以為無窮永久之類邑人多之而余兄嘗宰是邑言其善故與為記因附以所聞使刻諸石焉 趙抃題內照庵云山

老勝庵名內照掩扉然坐徒觀妙欲知畢竟事如
何無量壽光踰兩曜 岑象求題滌慮軒云聖人
重洗心君子貴浴德清心是道場金仙有遺則人
言我慮不須滌我謂幾人能滌得以此息萬緣以
此消六賊君不見水觀月觀
成道人盡向此門生妙識

廣慈院在縣西二十里唐景福中建仍賜額

陳侍郎公
輔嘗肄業

其間且為詩云來時膏雨迷新野去日薰風
吹舊林寄語主人休惜別白雲南北本無心

鷲峯院在縣北七里晉永和中建國朝治平二年賜額

大仁院在縣東一十里舊在山之下名智仁周顯德中

建國朝景德元年改今額乾道初徙今地有兩池

極清泚萼菜生焉

化城院在縣西一十五里舊名岱石唐乾寧二年建國朝治平三年改今額

清修院在縣東南一十五里金鵝潭下舊在縣南九十里治平三年賜額乾道六年徙今地

定光院在縣西二十里唐景福中建仍賜額國朝天聖七年重建

永壽院在縣西北二十里晉永和二年建唐會昌中廢

咸通中復建國朝大中祥符元年賜額

法蔭院在縣西二十里舊名靈雲唐乾寧二年建國朝

治平三年改今額

延壽院在縣西南二十五里晉天福五年建國朝治平

三年賜額

明寂院在縣北二十里治平三年建仍賜額

壽昌院在縣東南三十里舊名永昌唐大中間建國朝

淳化二年以犯藝祖陵名改今額

廣教院在縣南三十五里舊名石佛漢乾祐二年建國朝大中祥符元年改今額

淨安院在縣西四十里唐咸通九年建晉天福初僧德

倫重建四年賜額

廣嚴院在縣西四十里唐乾符間建國朝大中祥符元年賜額

香嚴院在縣南四十里唐開元元年建會昌中廢大中復建國朝大中祥符四年賜額有富文忠公遺華

嚴顥師及王樂道張隱之論道帖更兵火弗存

護法院在縣南四十五里舊在鳳城山下唐大順二年

建國朝治平三年徙今地仍賜額

普濟院在縣南五十里舊名安濟唐光化元年建國朝

治平三年改今額

淨慧院在縣南四十五里太平興國元年建今佛殿僅
存

梵安院在縣東南五十里舊名保安開寶中建太平興

國二年改今額

廣濟院在縣東南六十里舊名福壽唐咸通元年建國

朝大中祥符初改今額

資善院在縣東南六十里慶歷元年重建仍賜額

演法院在縣東南六十里舊名茶院端拱中建慶歷三年改看經院治平三年改今額

燈明院在縣東南六十里晉隆安二年建國朝大中祥符元年賜額

興教院在縣南七十里舊名興國治平三年改今額

資福院在縣南七十五里舊名瑞峯唐大順中建國朝

大中祥符二年改今額

按殿記云大順建寺時即賜額未詳

小明因院在縣南八十里唐咸通五年建國朝大中祥

符九年重建

妙巖院在縣南七十里治平三年建仍賜額

普照院在縣東南一百二十里唐乾符元年建國朝治

平三年賜額

梵興院在縣東南一百二十里舊名法興梁貞明元年
建國朝治平三年改今額

淨居院在縣東北一十五里唐咸通二年建國朝大中
祥符元年賜額

寶嚴院在縣西橋外唐太和元年建舊在縣東二十五
里後徙今地

靈雲院在縣西南三十里唐太和七年建國朝治平三
年賜額今廢

永寧院在縣西南三十五里唐乾寧三年建國朝治平三年賜額今廢

尼院二

明因寺在縣東三里舊名妙喜梁天監中周豹二女捨宅建唐會昌中廢大順中復建國朝大中祥符元年改今額紹興十一年尼慧淵復新之寺有華嚴閣額乃今上御書

傳法寺尼院在縣南八十里舊名明師唐乾寧三年建

國朝大中祥符元年改今額

天台

禪院一十有五

萬年報恩光孝寺在縣西北五十里唐太和七年僧普

岸建

舊經云隋大業二年建

初晉興寧中僧曇猷憇此四顧

八峯回抱雙澗合流

八峯謂明月娑羅香爐大舍銅魚藏像煙霞應澤

以

為真福田也遂經始焉會昌中廢大中六年號鎮

國平田梁龍德中改福田國朝雍熙二年改壽昌

建中靖國初火崇寧三年重建號天寧萬年紹興九年改報恩廣孝後改廣孝為光孝先是太平天禧中累賜袪衣寶蓋及御袍履諸珍玩甚衆故有

親到堂

以仁宗賜衣時口宣有如朕親到之語故名

妙蓮閣覽衆亭溥

熙十四年日本國僧榮西建三門西廡仍開大池香積有釜極深廣世傳闍提首那尊者所鑄東南十里有嶺曰羅漢巨杉偃蹇絜之大百圍凡供五百大士必於是邀請云

丁可福田莊記云耕而食生民所以為養浮圖氏作

迺衣食於持鉢其說行其與多斯民以耳目為信
向龜手蠶足楫楫朝夕輟口腹懼喜以為養釋氏
安焉於是議者始以不耕少釋氏伊庵權師來天
台主萬年方外禪衲雲闡霧合師謂其徒了性曰
來者多食指奈何吾觀大舍之陽羅漢之麓淖泥
之坻去寺數里兩山陰陰雪棘風林夾徑深深老
木千尋代虺匿蛟行邁寒心汝其屏除叢灌攘剔
芄樸高可以藝下可以植大舍之左平田之東洩闕
之上去寺一舍四山低回不險既夷土膏水深原
田每每管茅萃蓐風雨叢滋汝其雜蔚蒼刈蓊鬱
可以經理溝塍井畫疆場於是巨室豪舉具以為
宜接軫踵穀委貨散金迺運風靡贊喜無數性曰
原隰與區無有垠鐫施者有限疲人力於一役如其
德迺訪故老尋廢址築莊於洩上福田為屋一區
堂廡庫庖兩序具備存施錢千緡為母以倡子歲
取贏焉因農隙廣墾畝其本不搖而力有餘地歲

寢久且將瑀銜餘劄盡為阡陌高下封吟基分綺
錯利可既哉性以其說求記於可且曰萬年舊得
額曰福田今以名莊示反本也鏡施者姓氏於碑
陰示不忘本也可曰吾固不肯夫總總之不耕汝
知本哉三嘆而為之記 楊傑題妙蓮閣云天台
有新閣勝地近塔廟瀨浸碧瑠璃沿回出山嶠蓮
生淤泥中白玉有明竅華實相表裏光色互炳耀
處空不染着烈火豈能燎寶藏諸如來端坐演法
要責目付上士不待舉花笑芬香初洞達宿疴已
能療淨土託珍苞機感願力召三時有開發一本
常寂照不讀智者書焉知此蓮妙 羅適題云華
頂西邊天姥東妙蓮開閣對羣峯清含銀漢三千
界香透金庭第八重畫棟有聲啼海燕澄波無影
睡天龍夜深講罷何人見雲在青天月在松 張
舜民題云休論雪竇與雲峯且看天台劍戟叢萬
水千山來閣上一花六葉見池中誰將色界填空

界不雜香風席祖風有底妙蓮談不盡却成賦筆
與興公 鄭伯熊題羅漢嶺云蒼髯白甲老煙雲
萬木叢中獨挺身一柱擎天
須此物執柯他日屬何人

景德國清寺在縣北一十里舊名天台隋開皇十八年

為僧智顛建先是顛修禪于此夢定光告曰寺若

成國即清大業中遂改名國清李邕記所謂應運

題寺是也唐會昌中廢大中五年重建加大中

乃顛

柳公權 國朝景德二年改今顛前後珍賜甚夥合

所書

三朝御書幾百卷後燬于寇獨顛手題蓮經與西

域貝多葉一卷及隋旃檀佛牙僅存建炎二年重新之寺左右有五峯雙澗號四絕之一上有三賢

堂

謂豐干寒山拾得也

錫杖泉香積厨有訶羅大神像寺前

有新羅園唐新羅僧悟空所基東南有祥雲峰拾得巖東有清音亭其最高處有更好堂寺後巖有瀑布循澗而上尤為奇勝僧徒慮人至植叢棘以

障之

劉長卿送李使君寄題云露冕新承明主恩山城別是武陵源花間五馬時行縣戶外千

峯常在門晴江洲渚帶春草古寺松杉深暮猿知到應真飛錫處因君一想已忘言皮日休題云

十里松門國清路飯猿臺上菩提樹怪來煙雨
落晴天元是海風吹瀑布陸龜蒙和云峯帶樓

臺天外立明河色近梁慙濕松間石上定僧寒半
夜稍溪水聲急杜荀鶴題云一到天台寺高低

景旋生共僧巖上坐見客海邊行野色人耕破山
根浪打鳴忙時向閒處不覺有閒情周賀宿詩

云一宿五峯杯渡寺虛廊中夜磬聲分疎林未落
上方月幽澗忽生平地雲高鳥背泉生靜景遠人

當燭想遺文暫來此地歇勞足望斷故園滄海清
畢守士安題云三四百年寺今來國又清若非

逢聖祚徒自有嘉名月殿五峯色風松十里聲不
緣君命束便好脫塵纓陳堯佐題云南越第一

寺偶來心地真却嫌橋下水流入紅塵章守
得象題云松韻蕭騷十里清入門毛骨冷如冰題

詩已有丹青筆悟法應多黑白僧風雨只疑雙澗
瀑星辰長認上方燈來遊不是忘機客誰到雲峯

第一層

護國寺在縣西北二十里舊名般若周顯德四年建蓋

僧德韶第九道場國朝大中祥符元年改今額後

錢太師忱家乞為香燈院加廣恩

錢惟演題云峻極壓滄溟峯居

聚百靈重門深闕邃絕澗遠湛冥客問無生
法人遊不死庭何當謝替組鳥道駕飛軫

太平興國寺在縣東北二十五里白雲峯側舊名雲峯

梁乾化元年建蓋智顛第六道場後更名義建前

對香爐峯又有宴坐石石鼓石床看經闕皆顛經

行處也上有雷峯堂國朝太平興國五年改今額
文封寺在縣北五十里陳太建七年僧智顛建初顛入
山見一老父告云師卜庵遇盤石可止其後果如
所告遂結廬焉因自號靈墟蓋第五思修地其注
涅槃經處號智者嶺中有卓錫泉北望一峯摩雲
即華頂也隨開皇五年賜號靈墟道場漢乾祐中
改智者院國朝大中祥符元年改壽昌寺治平三
年改今額舊有瑞閣

陳侍郎公輔詩云晴雲漢漢
水滸滸危閣春歸白日閒若

問阿師消息處眼
前環列是青山

闕
在縣西九十里蘆峯舊名寶慈唐乾化闕

闕
瑫建盖天台十大刹之一也舊為闕

闕
處又是瑫卓庵已而造寺燃栢闕

闕
祥符元年改今額闕

闕
在縣西北三年五里舊名安國闕
元

年建盖僧德韶第二道場國朝大中祥符元年改

今額隆興初併入

闕

今復興有雙松亭

昆守公為詩云

雲間龍護千尋榦地底雷奔萬仞泉
寄語廬山舊遊客箇中端不減樓賢

寶相院在縣西北二十五里舊有保國華嚴吳越時僧

德韶建國朝大中祥符元年改今額

天聖中雪竇歡闕師主此

有偈頌闕
子闕傳之

淨明院在縣東北二十里按舊經本名高明唐

闕

七

年建今攷所藏錢氏遺墨乃清泰三年

闕

者幽

溪道場今殿前有石經幢刻云天福

闕

捨入幽

溪禪院可驗也國朝大中祥符元年改今額

西竺院在縣西北五十里舊名國泰唐大中十年建蓋僧智顛著止觀之地前有溪流或號幽溪道場國

朝大中祥符元年改今額

禪智院在縣北五十里舊名文殊晉天福

關

國

朝治平三年改今額

淨明院在縣西北五十五里舊名通圓定慧周顯德四
年建蓋僧德韶第一道場國朝大中祥符元年改

今額

福善院在縣西北七十里寒石山舊名崇福梁開平元年建蓋寒山子棲遁處周顯德中改聖壽昭儀孫氏重新之由明巖北五里而上四山聳秀水流亂山間鏘如佩環院宇周阿並置巖下窻扉軒戶開闔於烟雲紫翠中故南山之標勝者推寒明二巖國朝大中祥符元年改今額宣和中重建云

洪适題云

峭壁挿青冥層岩覆化城空中清磬發幽處慧燈明萬瓦是雲氣四簷無雨聲豐干不饒舌此地孰

名知

明聖院在縣南一十里舊名保壽觀音周廣順元年建

國朝治平三年改今額

大明院在縣東北九十里舊在塙西名菩提大同周顯德五年建後徙今地國朝治平三年改今額

教院一十有二

崇善寺在縣北五里赤城山下晉太元元年建先是興寧中僧曇猷依巖造寺號中巖後以多赤蟻徙平

地國朝大中祥符元年改今額政和八年又改玉

京觀未幾仍舊放生池在焉

舊經作太康初建寺按高僧傳曇猷興寧

中至台嶺若以為太康則是猷前已有寺百餘年矣唐許渾題中巖云蒼蒼松檜陰曉月露西

岑素壁秋燈暗紅爐夜火深厨開山鼠散鐘盡隴猿吟行役方如此逢師懶話心周朴題云浮世

師休話晉時燈照岩禽飛穿靜戶藤結入高杉存沒詩千首廢興經數函誰知將俗耳來此避鷺鷥

夏竦題云丹壁排空峭四濃上真應此駐靈蹤煙沈曉日明孤頂雲破餘霞出半峯岩下法師曾

伏虎洞中天子屢投龍他年翠輦東巡狩玉牒終須受大封

大慈寺在縣北二十九里舊名修禪或名禪林陳時為

僧智顛建

舊經云齊中興二年建

蓋顛思修初地及定光授

記銀地之所

定光所居號金地此號銀地皆以土色言之

直寺門巽隅

號佛隴顛第二宴坐處隋創國清乃更寺為道場

唐會昌中廢咸通八年重建國朝大中祥符元年

改今額其法堂曰淨名以顛嘗講是經故也又有

顛所供普賢及手書陀那尼經隋朝所賜寶冠尚

存有漱玉亭又有虞世南所書華嚴經紹興中為

秦丞相檜取去

葉清臣題云佛隴山沈茂草平林間猶作誦經聲一心三觀休分別

秋靜山高海月明
陸煥題云天下紛紛吹戰塵
我來佛隴悟修身
依然獲鶴如相識
知是山中幾世人
關

顯寧崇報院在縣東二百五十步舊有接待

關

五

年內侍陳良弼丐為薦福之地遂賜今額

東定慧院在縣東北一十五里舊名傳教乾德

關

年建

五代時僧希寂演天台教于此大中祥符

關

年改

今額縣西有普賢院亦號定慧今呼之為西定慧

云

天宮院在縣西二十里舊名旃檀瑞像吳越時僧德韶

建號第十一道場國朝祥符元年改今額

真覺院在縣北二十三里隋開皇十七年建僧闕葬

馬龕前置雙石塔號定慧真身塔院闕與所

賜方袍尚存國朝大中祥符元年改今額

普慶院在縣東北三十里舊名保興福慶晉天福闕年

建國朝闕改今額

無相院在縣西南三十五里舊在瑞龍巖北名獻闕唐

咸通二年建時有僧師簡以杖叩卧龍闕故名

遠近勝槩凡十

瀑布潭石門徑鹹水闕
香爐紫凝應闕
峯竇陲羅漢二
龍天柱

岩國朝大中祥符元年改今額治平中徙今闕

為之
記

鎮國院在縣西南四十里舊名開岩梁普通三年建蓋

因天花尊者肇岩得雪故名周顯德六年重建改
泗洲禪院國朝大中祥符元年改今額

金繩院在縣東五十里實栖禪支院慶歷中賜額

大智院在縣東六十里開寶七年建太平興國初建號
大明治平三年改今額

律院二

西安隱院在縣東北四十里舊名臻福建隆三年建大
中祥符元年改今額前有雙溪五峯

闕在縣西八十里舊名

闕

治平

闕

甲乙院四十有三

闡法寺在縣南五里舊去縣治五步名建平晉黎護將

軍劉元捨宅建

舊傳元因遇雨有金錢之異故建此寺

後有鴿子和

尚新之號鴿子道場側有靈龜峯又有綴石坡陀

迤邐草木蒙茂左右溪流縈帶民居皆桃花熙春

彌望如綺錯焉國朝大中祥符元年改今額

妙智寺在縣西北二十里宋末僧普

孝廟
嫌諱

建舊傳

孝廟
嫌諱

感江白郎之異遂以名巖

詳見
山門

隋大業中僧純陀

徙平地五十步唐貞觀十年賜號白巖寺會昌中

廢咸通二年重建加咸通國朝大中祥符六年改

今額舊有列秀亭及王羲之墨池

陳白詩云八重
峯頂望羣山百

谷東流去不還惟有右軍
遺跡在月波時落墨池間

寧國寺在縣西四十五里梁普通三年僧智達居焉每

誦經則有紫雲覆其上故山名紫凝後建寺名栖

禪唐會昌中廢大中五年重建國朝大中祥符元年改今額

大梵寺在縣西北七十里明巖五代時僧全宰棲焉入門兩石夾峙號石門前對幽石橫敞飛閣巖竇嵌空堂宇半居其下大概如寒石山國朝大中祥符元年賜額

福應寺在縣西南七十里舊名普開漢乾祐三年建蓋僧德韶第六道場國朝大中祥符元年改今額

普慈院在縣北一里舊在蓮華峯頂名大悲開寶七年
建治平三年改今額熙寧三年徙今地

清心院在縣東一十里舊號螺溪以僧智顛放螺溪中
故名今上有螺如巨螭或出沒焉國朝治平三年
改今額

禪林院在縣西南一十五里舊號龍山集雲隋僧智顛
建唐天寶六年改龍山為始豐國朝乾德二年號
龍山崇修大中祥符元年改今額

東廣福院在縣東一十五里舊名靈水庵寶元二年建
治平三年改壽聖紹興三十一年改今額

大覺院在縣東南一十五里舊名華嚴道場乾德三年
建治平三年改今額

永寧院在縣東北一十五里舊名普寧周顯德四年吳
越王建國朝治平三年改今額

景福院在縣西二十五里周顯德七年建俗呼茶院蓋
僧德韶施茗處國朝開寶三年賜號崇福大中祥

符元年改今額

興教院在縣南三十里吳赤烏二年建舊有牧禪師廬
於此以其衆峯縈抱號回巒庵及是始為院國朝
大中祥符元年賜今額

仁壽院在縣東北三十里舊名九明漢乾祐二年建蓋
僧智顛宴坐九折道場國朝治平三年改今額

西廣院在縣西三十里舊名水陸太平興國四年建
熙寧三年改壽聖紹興三十一年避高廟尊號改

今額

秀巖院在縣西北三十五里舊名西雲晉天福八年建
蓋僧德韶第三道場國朝大中祥符元年改今額
淨安院在縣西南三十五里唐乾符二年建先是吳赤
烏中有周禪師居此以山如屏峙名翠屏庵及是
始為院國朝治平三年賜今額

資福院在縣東南四十五里舊名清化吳赤烏二年建
國朝治平三年改興化隆興初賀叅政允中家乞

為香燈院遂改今額

普光院在縣西北四十里舊名長壽後唐清泰元年建

國朝大中祥符元年改今額

鷲峯院在縣西五十里舊名峇嶺唐大中三年僧懷玉

建國朝咸平三年改今額

廣嚴院在縣西五十里舊名長隴唐光啟三年建凡三

徙至今地國朝治平三年改今額

寶興院在縣西南五十七里舊名寶壽漢乾祐三年建

國朝治平三年改今額

永福院在縣西六十里舊名靈瑞唐咸通四年建國朝

大中祥符元年改今額

闕院在縣西北三十五里漢乾祐元年建蓋德韶

第四道場國朝大中祥符元年賜額

善興院在縣東北六十里舊名華頂圓覺道場晉天福

元年僧德韶建蓋僧智顛嘗宴坐於此故有定光

招手石古語云定光金地遙招手智者江陵暗點

頭是也又有降魔塔伏虎壇鬼壘石白雲先生室
甘泉先生居今耆舊又傳葛元茶圃王羲之墨池
然無所據國朝治平三年改今額

寶華院在縣東六十里舊名太平唐乾符二年建國朝
治平三年改今額

實相院在縣西南七十里舊名彌陀塔院周顯德中建
蓋僧德韶第七道場國朝大中祥符元年賜今額
東安隱院在縣東七十里舊名隱嶼漢乾祐三年建國

朝治平三年改今額

淨居院在縣西北七十三里舊名華嚴庵蓋僧居月誦

此經處治平三年賜今額

證教院在縣北一百里舊名無量壽佛塔院建隆元年

建蓋僧德韶第十道場後於此示滅大中祥符元

年改今額

澄心院在縣北一百三十里舊名澄明治平元年改今

額

金文藏院在縣西北六十里蓋萬年支院漢乾祐三年
建國朝咸平二年賜額有金書大藏經五千二百
卷實太宗所賜護飾甚偉建中靖國中燬于火

瀑布寺在瀑布西一里宋元嘉二年僧法順建今廢

隱嶽寺在縣東一十里鳳凰山西梁大同元年西域梵
僧建隋大業元年廢唐貞觀元年重建俗或傳為

鳳凰寺今廢

白馬寺在縣西四十里陳時建唐會昌中廢

佛窟寺在三井西峯上僧遺則卓庵居之唐會昌中廢
飛霞寺按神邕山圖在赤城山腹梁岳陽王妃建其後

僧定光居之梁亡寺廢

慧明院在縣東北六十里華頂峯上舊名慧日俗又呼

東峯梁乾化元年建國朝治平三年改今額近廢

闕
十五里晉開運闕

闕
庵於此號金地定光後廢

先照庵在縣北五十里建中靖國元年建後燬于兵紹

熙四年復新之

詳見石橋

中有妙音曇華二亭應真閣

舊有先照亭今廢

葉清臣詩云一逕涼飈響萬松青霞紫霧祕靈蹤寒生別洞前

溪雨聲到諸天午夜鐘山頂月高猶駕鶴潭陰雲起舊降龍出塵境界無多遠已上金鹿第七重

頭陀庵在縣西九十里隋開皇十八年建初國清有聖

者頭陀詣雷馬山伐木建殿相距絕遠聖者作法

致雨一夕暴漲木蔽流而下後人為卓庵焉

楊傑為施

結界文

斷橋道場在縣北七十里國朝開寶元年建太平興國

五年廢

赤城志卷二十八